



Векало Якъуба яздина кехат

Векало Якъуба яздинчу кехат тIехъ «дуьнен чухула дIасабаьржинчу» массо а Иийсах тешаш болчаьргахула чекхбахархъама бина болу хъехамаш цхъаьнатоьхна бу. Яздархочо дукха масалшкахула а, кицанашкахула а Иийсах тешаш болчу нахана муха лела беза хоуьйтуш болу хъекъале хъехам ло. Тешаш берш муха хила беза а гойтуш, тайп-тайпанчу хIуманех лаьцна бо цо и хъехам: хъал а, къоьлла а, зер а, оздангалла а, озабезам а, гIуллакхашца долу тешар а, меттан дола дар а, хъекъалалла а, къовсам а, вазвар а, эсалалла а, кхечунна кхел яр а, собар а, доIа а.

Кехат тIехъ Якъуба чIагIдина, Иийсах а тешаш, и тешар гойтуш долу гIуллакхаш дан деза вай аьлла.

Дешхъалхе

1 ¹Делан а, Цо леррина къобалвинчу Иийса-Элан а лай волчу Якъубера дуьнен чухула дIасабаьржинчу шийтта тайпане* маршалла ду.

Делах тешар а, хъекъалалла а

²Сан вежарий, доккха хазахетар санна ларалаш тайп-тайпана зераш шайна тIе мосазза хIуьтту. ³Шуна-м хаьа шайн тешар зерах чекхдаларо собар кхиош дуйла. ⁴И собар кхачаме хилла дIахIотта деза, шу, цхъа а дерт а доцуш, дуьззина кхачамалла долуш хилийта. ⁵Амма шуна юкъахь цхъанна хъекъалалла ца тоахь, цо иза Деле деха деза. Ша луш дерг атта а, бехкаш ца дохуш а луш волчу Цо иза массарна а лур ду. ⁶Амма иза тешарца а, шеко йоцуш а деха деза, хIунда аьлча шеко йолуш верг мохо ловзочу тулIенах тера ву. ⁷Иштта волчу стага, Везачу Элера цхъаь тIеобьцур ду алий, дог а ма даха. ⁸Шалха ойланаш йолу стаг ма ву иза, ша дечу хIуманна тIехъ чIагIо а йоцуш.

* ^{1:1} *Шийтта тайпане* — Якъуба боху, Иийсах тешнарш мостагIаша массанхъа дIасадаржийна хиллачу Исраилан халкъан шийтта тайпанах тера бу.

^{1:1} Маттай 13:55; Марк 6:3; Векалийн 15:13; Галатахошка 1:19.

Къоьлла а, хъал а

⁹Таро йоцу динан ваша синан лакхарчу хьолах воккхавеван веза, ¹⁰ткъа таро йолуш верг синан лахарчу хьолах воккхавеван веза, хIунда аьлча иза дIавер ву дуьнен чуьра, бецан зезаг санна. ¹¹Малх хъала а гIюттий, йовхо йогIу. Йовхоно буц якъайо, бецан зезаг дужу, хазалла а дIайолу. Иштта хъалдолу стаг а, шен гIуллакхаш а деш, дIаволу.

Зер а, хIума марздалар а

¹²Декъалвина ву зенашна садеттарг, хIунда аьлча иза зийначул тIаьхъа, ял санна, хедар доцучу дахаран таж лур ду цунна Ша везачарна иза лур ду аьллачу Везачу Эло. ¹³Ша зуьйш волчу хенахь стага ма баха: «Дала со зуьйш ву». Вочу хIуманца Дела зелур вац, ткъа Цо Ша цхъа а ца зов. ¹⁴Амма хIора а шен харц лаамаша зуьйш ву, цара иза, Iеха а вой, дIалоцу. ¹⁵Стаг харц лаамца цхъаьнакхеттачул тIаьхъа, цу харц лаамо къа кхуллу, ткъа къино, кхачаме схъа а кхаьчна, Iожалла кхуллу.

¹⁶Шаьш Iеха ма дайта, сан хьомсара вежарий. ¹⁷Муьлхха а дика а, кхачаме а совгIат лакхара, стигалан серлонаш кхоьллинчу Дегара догIу. Иза, уьду мархаш санна, хийцалуш вац. ¹⁸Шен лаамца, бакъдолчу кхоаца кхоьллина Цо вай, Ша кхоьллинчарна юкъахь вай лараме* хилийта.

ЛадогIар а, кхочушдар а

¹⁹Сан хьомсара вежарий, муьлхха а стаг ладогIарна сихвала веза, ткъа шен хабарна а, оьгIазаллина а собаре хила веза, ²⁰хIунда аьлча адаман оьгIазалло стаг Далла хъалха бакъ ца хуьлуьйту. ²¹Цундела муьлхха а хъарам хIума а, вон мел лелар а дIадаккха. Далла муьтIахь а хуьлуш, шайга кховдийна а, шаьш кIелхьардаха тарлуш долу а Делан дош тIеэца.

²²Делан дош кхочушдеш болчарах хилалаш, цуьнга ладугIурш бен а ца хилла, шаьш Iехочарах тар а ца луш. ²³ХIунда аьлча, Делан даше ла а дугIуш, иза кхочуш ца деш волу стаг шен билггал йолчу юьхье куьзгана чу хьоьжучух тера ву. ²⁴Шега а хъаьжна, иза юьстахволу, ткъа цу сохьта шен юьхьсибат цунна дицло. ²⁵Амма Делан кхачаме болчу а, паргIато лучу а хъехаме леррина а хьожуш, цуьнан кхидIа а тидам а беш, вицлуш волу ладогIархо а воцуш, и хъехам кхочушбийриг ша мел дечу гIуллакхашна тIехъ декъалвина хир ву.

²⁶Нагахь цхъаммо, ша суьпа а хеташ, шен маттана дуьрста ца йолахь, цо ша-шен Iехаво, цуьнан суьпа хилар а даьсса ду. ²⁷Да волчу

* ^{1:18} *Лараме* — кхузахь Якъуба Иийсах тешаш берш дуьххъара схъаэцначу ялте тарбо, хъалха жуьгташа Везачу Элана сагIина луш долу ялта санна.

^{1:10}, ¹¹ ЕшаI-ЯхIу 40:6, 7 (Грекийн).

Далла хьалха цѐна а, бехдалаза а суьпалла иштта ду: байшна а, бисина Іачу зударшна а гІо дар а, дуьнен чохь долчу вочуьнга ша бех ца вайтар а.

Озабезамах лаьцна

2 ¹Сан вежарий! Дала леррина къобалвинчу Іийсах, вайн сийлаллин Элах, а тешаш, озабезамца цхьаьнга ма хьажалаш. ²Нагахь шун гуламе, дашо мухІар а доьллина, деза духар дуьйхина хьалдолу стаг веача а, беркба духар дуьйхина къен стаг веача а, ³аша, деза духар дуьйхина волчу стаге а хьаьжна, цуьнга ала мега: «Кхузахь дика хир ду хьуна, охьахаа», ткьа къечуьнга ала мега: «Хьо хьуьлла дІахІотта, я кхуза, сан когашка, охьахаа». ⁴Иштта дича, шайна юкьахь къестамаш кхуллий те аша? Харц-ойланаш йолу кхелахой хуьлий те шух?

⁵ЛадогІийша, сан хьомсара вежарий, дуьнен чуьра къен нах Дала ца хаьржина те? Тешарехь хьал долуш хилархьама а, Ша везачарна лур ду аьллачу олалле кхачийтархьама а Дала уьш ца хаьржина те? ⁶Ткьа аша къениг дІатеттина. Хьалдолу нах бац шуна ницкъ беш берш, уьш бац шу кхеле ийзош берш? ⁷Шуна елла сийлахь цІе сийсазъеш бац уьш?

⁸Нагахь Делан Йозанашна тІера болу паччахьан хьехам: «Уллораниг веза, хьо санна», аша кхочушбахь, аша деш дерг нийса ду. ⁹Амма стаге озабезамца шу хьовсахь, аша къа латадо, товрат-хьехамо шу, зуламхой санна, бехкедо. ¹⁰Берриг а товрат-хьехамаш кхочуш а беш, цхьана хІуманна тІехь къалатийнарг массо а хІуманна тІехь а бехке хуьлу. ¹¹«Нахаца ма лела», — Аьллачо аьлла: «Адам ма де», цундела, нагахь хьо нахаца лелаш вацахь, амма ахь адам дехь, хьо Дала тІедиллинарг дохош волу зуламхо ву. ¹²ПаргІато лучу хьехамашка хьаьжжина, Дала кхел ен йолчу наха санна, ала а ала, гІуллакх а де. ¹³ХІунда аьлча къинхетам боцу кхел хир ю шегара къинхетам ца гайтинчунна. Къинхетам кхелал а лакхара бу.

Тешар а, гІуллакхаш дар а

¹⁴ХІун пайда бу, сан вежарий, стага шен тешар ду баьхча, амма цо деш долчу гІуллакхаша иза гойтуш ца хилча? Ишттачу тешаро кІелхьарвок-кхур вуй иза? ¹⁵Нагахь вешина я йишина тІеюху хІума а, кхача а эшахь, ¹⁶ткьа шух цхьаммо цаьрга алахь: «Маьрша дІагІо, дох а ло, дуззалц хІума а яа», амма царна обшург ца лахь, хІун пайда бу цуьнан? ¹⁷Иштта ду тешар а, нагахь цуьнца цхьаьна деш гІуллакхаш дацахь, иза делла ду.

¹⁸Амма цхьаммо ала тарло: «Хьан тешар ду, ткьа сан гІуллакхаш ду». ГІуллакхашца доцуш долу хьайн тешар гайта суна, ткьа аса гІуллакхашца долу сайн тешар гойтур ду хьуна. ¹⁹Хьо теша Дела цхьаь хиларх, иза дика

^{2:8} Іамалгяр 19:18. ^{2:11} Арадаккхар 20:14; Карлабаьккхинарг 5:18; Арадаккхар 20:13; Карлабаьккхинарг 5:17.

ду. Ур-атталла жинаш а теша Иза хиларх — ткьа уьш кхерарна дегадо! ²⁰Амма хаа лаьий хьуна, сонта стаг, гІуллакхашца доцу тешар эрна дуйла? ²¹Шен гІуллакхашца Далла хьалха бакъхилла вац вайн да ИбрахІим, шен кІант Исхьах сагІа доккхучу меттиган гІулгашна тІе а виллина? ²²Гой хьуна, цуьнан тешар гІуллакхашца цхьаьнадогІуш хилла, и гІуллакхаш бахьана долуш и тешар кхачаме хилла. ²³Делан Йозанашкахь аьлларг кхочушхилла: «ИбрахІим тийшира Везачу Элах, цундела Цо иза Шена хьалха бакъвина лерира», цунах Делан доттагІа элира. ²⁴Гой шуна, стаг Далла хьалха бакъхуьлу шен гІуллакхашца, тешарца хилла а ца Іаш.

²⁵Иштта, нахаца лела Рахьаб ша дина гІуллакх бахьана долуш Далла хьалха бакъхилла, бахкийтина нах тІе а лаьцна, уьш кхечу новкъахула дІа а хьовсийна. ²⁶Цундела, шена чохь са доцу дегІ делла ма-хиллара, гІуллакхашца доцу тешар а делла ду.

Шайн меттан дола де

3 ¹Сан вежарий! Шуна юкьара кІеззиг нах бен ма хила хьехархой. Шуна хаьа, вайна еш йолу кхел мел чІогІа хир ю, ²хІунда аьлча вай массара а къинош дукха летадо. Дашаца цкъа а къа ца латош верг кхачаме стаг ву, цуьнга шен дерриг дегІан дола дало. ³Вай говрийн бага гаьллаш йохку, уьш вайга ладугІуш хилийта, тІаккха церан догІмаш леладо вай. ⁴Масала, хІордан кеманаш а, мел даккхий уьш делахь а, ондачу мехаша лелош делахь а, жимачу тІомаца дІадохуьту хІордахочо шена луьучу. ⁵Иштта, матто а, кІезиг меже елахь а, доккхачу гІуллакхашна тІехь куралла йо.

Хьажал, жимачу цІаро мел йоккха хьун ягайо! ⁶Мотт а цІе ю. Иза де-гІан вукху меженашна юкьахь вон дуьне санна бу. Матто дерриг дегІа а бехдо, вайн дахаран некъ хьала а латабо. Ткьа ша жожжахатин цІарах хьалалеташ бу иза. ⁷Муьлхха а экха а, олхазар а, текхарг а, хІордан дийнат а стага караІамадан тарло (баккъалла а, уьш караІамийна ду). ⁸Амма адамашка цхьаьнгге а мотт кара ца Іамало, иза саца ца луш долу вон ду. Мотт Іожаллин дІовшах буьзна бу. ⁹Цуьнца Веза Эла а, Да а декьалво вай, цуьнца Делан сибатехь кхоьллинчу адамна неІалт а олу вай. ¹⁰Цхьана багара схьадолу декьалвар а, неІалт алар а. Иштта хила йиш яц, сан вежарий. ¹¹Цхьана хьостанах схьадер дуй мерза а, къаьхьа а хи? ¹²Сан вежарий, инжиран дитта тІе зайт-диттан стоьмаш а латор бац, кемсийн таьлланга тІе инжираш а латор яц. Иштта дуьрачу хьостано мерза хи лур дац.

Лакхара долу хьекьалалла

¹³Ша хьекьал а, кхетам а болуш волчо шен обздачу леларца а, хьекьалера схьадолчу эсалаллехь динчу гІуллакхашца а гайта ца деза иза? ¹⁴Амма

^{2:21} Доладалар 22:1-14. ^{2:23} Доладалар 15:6; 2 Шерашкахь 20:7; ЕшаІ-ЯхІу 41:8.

^{2:25} Якъуба 2:1-21. ^{3:9} Доладалар 1:26.

шун даг чохъ къаьхъа хьагI а, шена пайда лехар а делахъ, дозаллаш ма де, бакъдолчунна дуьхьал харцо ма лелае. ¹⁵Иза лакхара долу хьекъалалла дац, амма дуьненан, синан, жинийн хьекъалалла ду. ¹⁶ХIунда аьлча хьагI а, шена пайда лехар а долчоьхъ низам дохор а, мел долу вониг а ду. ¹⁷Амма лакхара долу хьекъалалла, цкъа-делахъ, цIена ду, цул тIаьхъа, машаре а, оьзда а, къинхетамах а, дикачу стоьмех а дуьзна а, озабезам боцуш а, шалхо йоцуш а ду. ¹⁸Барт кхуллуш болчара бертахъ дийначу хIух нийсонан ялта схьадолу.

ХIара дуьне дезар

4 ¹Къийсамаш а, девнаш а мичара ду шун? Шун меженашкахъ вовшашца тIом бечу а, дуьненан хIума тIех дезачу а лаамех схьадуьйлуш дуй те уьш? ²ХIума деза шуна, амма иза ца хуьлу шуна. Адам дел чIогIа хьагI хуьлу шуьца, амма дезачуьнга ца кхачало шу. Вовшашца а къуьйсу, девнаш а доху аша, амма дезарг ца хуьлу шуна, хIунда аьлча аша, Деле доьхуш, доIа ца до. ³Дехча а, ца хуьлу шуна иза, хIунда аьлча аша дикачу хIуманна ца доьхуш, дуьненан хIума тIех дезачу шайн лаамийн дуьхъа доьху. ⁴Тешам боцуш! ХIара дуьне дезар Делаца мостагIалла хилар дуйла ца хаьа шуна? Дуьненах шена доттагIа хила лууш верг Делан мостагIа хуьлу. ⁵Шуна моьтту хир ду Делан Йозанашкахъ эрна аьлла: «Дала вайна чохъ Iан деллачу Синна вай Шен хила лаьа»? ⁶Амма Дала кхин а доккха дика дина вайна. Цундела аьлла ду:

«Дела курачарна дуьхьал ву,
ткъа муьтIахъ болчарна Шен дика ло Цо».

⁷Цундела Далла муьтIахъ хила, иблисана дуьхьалдовла, тIаккха иза шух додур ду. ⁸Далла улло гIо, Иза а шуна улло вогIур ву. Къинош летийнарш, шайн куьйгаш дила, шалхончаш, шайн дегнаш цIанде. ⁹Халахета, делха, тийжа. Шун деларх делхар хуьлийла, хазахетарх сингаттам хуьлийла. ¹⁰Везачу Элана муьтIахъ хила, Цо ойур ду шу.

Вежарина кхел ярх лардар

¹¹Вежарий, лен ма ле вовшашна. Шен ваша вон вуьйцуш, я цунна кхел еш волчо Делан хьехамна кхел а йо, иза вон а буьйцу. Нагахъ хьо Делан хьехамна кхел еш велахъ, хьо иза кхочушбеш вац, ткъа цуьнан кхелахо ву. ¹²Хьехам Белларг а, Кхелахо а цхьаь ву, Цо кIелхьарваккха а, хIаллакван а тарло. Ткъа хьо мила ву кхечунна кхел ян?

Дозаллаш дарх лардар

¹³Ткъа хIинца аша ладогIалаш, хIара къамел дийраш: «Тахана я кхана оцу гIала а дахана, цигахъ цхьана шарахъ Ийр ду вай, мах а лелийна,

^{4:6} Кицанаш 3:34 (Грекийн).

пайда бийр бу вай». ¹⁴Шуна ца хаьа, кхана хIун хир ду. ХIун ду шун дахар? КIеззигчу ханна деана а, юха дIадолу а дохк ду иза. ¹⁵«Везачу Элана лаа а лиьна, вай дийна дисахъ, хIара я кхин дийр ду вай», — аларан метта, ¹⁶шу дозаллаш деш ду, шаьш дегала долу дела. Ткъа муьлхха а иштта дозалла вониг ду.

¹⁷Цундела, дан дезаш долу диканиг а хууш, и ца деш волчунна къа хир ду.

Хьалдолчарна дIахьедар

5 ¹ЛадогIалаш аша, хьалдолчара: делхалаш, тийжалаш, хIунда аьлча бохамаш бу шуна тIехIуьттуш. ²Шун хьал, телхина, дIадаьлла, шун духарш нецано диина. ³Шун деши а, дети а мекхадоьлла. Церан мекха шуна дуьхьал тоьшалла деш хир ю, цо, цIаро санна, дагор ду шун дилха. Ткъа аша дуьненан тIаьххьарчу деношкахъ шайна хазна гулийна. ⁴Шун аренаш лелийначу белхалойн ял ю кхойкхуш, аша, дIа ца луш, сацийна йолу. Ялта чудерзочеран тийжар массо а ницкъийн Везачу Элан лергашка кхаьчна ду. ⁵Шу, хьал а долуш, даьхна дуьнен тIехъ, зовкх а хьогуш. Шаьш дарстийна аша, сагIа даккха кечдина бежанаш санна. ⁶Аша, кхел а йина, бехк боцуш байира. Цаьрга шуна дуьхьало ца яло.

Собар а, доIа а

⁷Вежарий, собаре хилалаш, Веза Эла схьаваллалц. Латта лелош волчо безачу стоьме сатуьсийла хабий шуна? Иза собарца хьогьжу хьалхара а, тIаьхьара а догIа даре. ⁸Иштта шу а чIогIа собаре хилалаш, шайн дегнаш чIагIделаш, хIунда аьлча Веза Эла вар гергакхочуш ду.

⁹Вовшашна аьрзнаш ма делаш, вежарий, шайна кхел ца яйтархьама, хIунда аьлча Кхелахо неIарехъ лаьтташ ву. ¹⁰Баланаш а ловш, собаре хиларан масална Везачу Элан цIарах дуьйцуш хилла болу пайхамарш схьаэца, сан вежарий. ¹¹Собарца баланах хьегнарш декъалбинарш лору вай. Шуна хезна Аюба лайначу халонех лаьцна. Ткъа Везачу Эло цунна эххар а динарг а хаьа шуна, хIунда аьлча Веза Эла чIогIа къинхетаме а, стагах дог лозуш а ву.

¹²Уггар хьалха, сан вежарий, стигалх а, лаьтта а, я кхечу хIуманах а чIагIонаш ма елаш, амма шун «хIаь» «хIаь» хила деза, «хIан-хIа» «хIан-хIа» хила деза, шу бехке ца хилийтархьама.

¹³Шух цхьаь бала хьогьгуш велахъ, цо доIа дан деза, самукъадаьлла велахъ, хастам баран йиш лакха еза. ¹⁴Шух цхьаь цомгуш велахъ, цо Ийсах тешачийн тобанан куьйгалхой кхайкха беза. Цара доIа дан деза цунна тIехъ, Везачу Элан дуьхъа цомгушчунна деза даьтта а хьокхуш.

^{5:2, 3} Маттай 6:19. ^{5:4} Карлабаьккхинарг 24:14, 15. ^{5:11} Аюб 1:21, 22; 2:10; Забур 102:8.

^{5:12} Маттай 5:34-37. ^{5:14} Марк 6:13.

¹⁵Тешаран доІано цомгушниг товийр ву, Везачу Эло иза когаш тІе хІот-тор ву. Нагахь цо къинош летийнехь, цунна гечдийр ду. ¹⁶Шайгара даьлладу къинох лаьцна даре а деш, вовшех лаций доІа де, шайна гІоле хилийта: Делан лаамехь волчо динчу доІано дуккха а дан тарло, цуьнга-хула ницкъ баларна. ¹⁷ЭлияхІу вай санна стаг вара. Цо, догІа ма даийта аьлла, чІогІа доІа дича, кхаа шарахь а, ялх баттахь а лаьтта тІе догІа ца деара. ¹⁸Юха цо доІа дича, стигалара догІа а деара, лаьтто шен стом а белира.

¹⁹Вежарий, нагахь шух бакъдолчун новкъара ваьлларг цхьаммо нис-вахь, ²⁰цунна дІахайла, харц новкъара къа латийнарг нийсачу новкъа ваьккхинчо лечуьра са кІелхьар а доккхур ду, дуккха а къинош дІа а къовлур ду.

^{5:17}Сулим 17:1; 18:1. ^{5:18}Сулим 18:42-45. ^{5:20}Кицанаш 10:12; 1 Кипин 4:8.